

1. ხედვა: *რა გესახებათ თქვენი, როგორც საქართველოს პრეზიდენტის ყველაზე დიდ ამოცანად?*

საქართველო ამ ხუთი წლის შემდეგ, ჩემი პრეზიდენტობის ვადის დასასრულს, შემდეგნაირად მესახება:

ესაა დემოკრატიული ქვეყანა, სადაც დაცულია ადამიანის ყველა - პოლიტიკური, ეკონომიკური, სოციალური, კულტურული, ეკოლოგიური უფლება; ქვეყანა, რომელსაც აქვს სტაბილური ეკონომიკური განვითარების ვექტორი; დაძლეულია უმუშევრობის პრობლემა; ადამიანები იღვწიან და შრომობენ მშვიდობისა და კეთილდღეობის გაძლიერებისთვის; ქვეყანა, რომელიც საიმედო პარტნიორია მსოფლიო თანამეგობრობისთვის; სადაც ვითარდება საზოგადოების სრულფასოვანი, ღირსეული ცხოვრების ყველა სფერო: კულტურა, მეცნიერება, სპორტი, მედია და ა.შ.; სადაც სამოქალაქო საზოგადოება ხელისუფლებისგან დამოუკიდებლად ვითარდება, თუმცა მუდმივად აკონტროლებს მას; სადაც ბიზნესის ინტერესები დაცულია და მეწარმეობის განვითარებისთვის ყველა პირობაა შექმნილი; სადაც სახელმწიფო ზრუნავს მოქალაქეებზე; პოლიტიკური ვითარება სტაბილურია; ტერიტორიული პრობლემებისა და კონფლიქტების მოგვარებისკენ გადადგმულია ქმედითი ნაბიჯები; განვითარების ევროპული ვექტორი სტაბილური და შეუქცევადია და არავის ექვს არ იწვევს არც ჩვენში, არც ქვეყნის გარეთ.

მე ვიმოქმედებ კონსტიტუციით მონიჭებული ყველა უფლებამოსილებით, გამოვიყენებ პრეზიდენტის ინსტიტუტის ყველა ბერკეტს, ხალხის სამსახურში ჩავაყენებ ხალხისავე არჩეული უმაღლესი თანამდებობის პირის მთელ ძალაუფლებას, რათა ჩემს თანამებრძოლებთან, კოალიციასთან, ბატონ ბიძინა ივანიშვილთან, ჩვენი ქვეყნის მოქალაქეებთან ერთად ეს ხედვა რეალობად ვაქციოთ.

2. განათლება: *როგორია თქვენი ხედვა განათლების პოლიტიკის მიმართ? როგორ პოლიტიკას უჭერთ მხარს დაწყებითი, საშუალო, პროფესიული და უმაღლესი განათლების ხარისხის გასაუმჯობესებლად?*

განათლების სისტემა ქვეყნის სტრატეგიულ ამოცანებს უნდა დაუკავშირდეს. სახელმწიფო ვალდებულია, ქვეყნის ინტერესების შესაბამისად მოაწიოს განათლების სისტემა. ის თავად უნდა გახდეს განათლებისა და სამეცნიერო კვლევების უმთავრესი დამკვეთი.

ქართულ აკადემიურ სივრცეში რეალურად უნდა განვახორციელოთ უნივერსიტეტთა ავტონომიურობა და აკადემიური თავისუფლება, ამისათვის უნდა შეიქმნას შესაბამისი საკანონმდებლო გარანტიები და მექანიზმები.

ქვეყნის წინსვლისა და სრულფასოვანი განვითარებისთვის აუცილებელია პროფესიონალები, სპეციალისტები. სახელმწიფოს გრძელვადიანი განვითარება გადამწყვეტ როლს აკისრებს განათლებასა და მეცნიერებას.

3. გადასახადები: *თქვენი აზრით, როგორი საგადასახადო სისტემაა მისაღები საქართველოსთვის და რა პრინციპით უნდა განისაზღვრებოდეს საშემოსავლო გადასახადი?*

ეკონომიკის განვითარებასთან ერთად შეიძლება საგადასახადო სისტემის კიდევ უფრო დახვეწაზე ვიფიქროთ. თუმცა, დღეს მოქმედი საგადასახადო სისტემა ეფექტურია და ხელსაყრელ პირობებს ქმნის უცხოელი თუ ქართველი მეწარმეებისა და ინვესტორებისთვის.

4. ეკონომიკა: *როგორია თქვენი ხედვა ეკონომიკური ზრდის უზრუნველსაყოფად? რა არის პრიორიტეტული და რა კონკრეტულ ინიციატივებს შესთავაზებდით საქართველოს მთავრობასა და პარლამენტს?*

ქვეყნის სტრატეგიის ძირითადი ამოცანაა ყოვლისმომცველი ეკონომიკური ზრდა. ყოველმა მოქალაქემ უნდა ისარგებლოს მიღწეული დადებითი შედეგებით და შესაძლებელი გახდეს მოსახლეობის საყოველთაო მონაწილეობა ეკონომიკური ზრდის პროცესში.

ჩვენი პრიორიტეტებია: სტაბილური გარემოს შექმნა, ახალი ტექნოლოგიების დანერგვა, ინვესტიციების მოზიდვა, ბაზრების გაფართოება, ქართული პროდუქციის ექსპორტის წახალისება, ქვეყნის საწარმოო, ენერგეტიკული და სატრანზიტო პოტენციალის გაზრდა, საერთაშორისო ეკონომიკურ პროექტებში უფრო ინტენსიურად მონაწილეობა.

ჩვენ დავიწყეთ და უნდა განვახილოთ ხელსაყრელი პირობების შექმნა ბიზნესისა და მეწარმეობისთვის. ამ მიმართულებით ვითარდება შეღავათიანი სესხების და ბიზნეს-ინკუბატორების პროგრამები.

სოფლის დახმარება გაგრძელდება, ვიდრე სოფელი ფეხზე არ დადგება. სოფლად ურბანული ცხოვრების წესის დამკვიდრებისთვის ხელს შეუწყობთ ისეთი სამოქალაქო-კულტურული ინფრასტრუქტურის მოწყობას, რომელიც სოფლად ცხოვრებას მიმზიდველს გახდის, ხელს შეუწყობს ხალხის, განსაკუთრებით კი, ახალგაზრდობის ადგილზე დაფუძნებას. სოფლად სრულფასოვანი ცხოვრების შესაძლებლობების შექმნით თავიდან ავიცილებთ მიგრაციასა და დემოგრაფიულ პრობლემებს.

თანამედროვე მსოფლიოში ეკონომიკა ვერ დაეფუძნება მხოლოდ ამოწურვად რესურსებს, მით უმეტეს, ბუნებრივ რესურსებსაც ცოდნით უკეთესად და უფრო ეფექტიანად მოვიხმართ, ვიდრე ცოდნის გარეშე.

ეკონომიკური პროცესების უმთავრეს მამოძრავებლად ჩვენ უნდა ვაღიაროთ არა ამოწურვადი რესურსები, არამედ ადამიანური ინტელექტი. ამიტომ აუცილებელია ადამიანური კაპიტალის განვითარება და განათლების სისტემის რეფორმა.

თითოეული ჩვენგანის ინტელექტუალური პოტენციალის სრულად გამოყენებით საქართველოს ეკონომიკურად ძლიერ, მიმზიდველ და საინტერესო ქვეყნად გადავაქცევთ.

საქართველო გახდება ტრადიციულ და ევროპულ ღირებულებებზე დაფუძნებული კეთილდღეობის ქვეყანა, რომელიც მუდმივად განვითარებისკენ ისწრაფის.

5. დასაქმება: *თქვენი აზრით, რა არის ის ძირითადი ნაბიჯები, რაც სახელმწიფომ უნდა გადადგას უმუშევრობის პრობლემის მოსაგვარებლად?*

უმუშევრობის პრობლემის მოგვარების გასაღები ეკონომიკის განვითარებაში, ახალი სამუშაო ადგილების შექმნაშია. თუმცა ყველაზე განვითარებული ეკონომიკების ქვეყნებშიც კი არ არის უმუშევრობა სრულად აღმოფხვრილი. ჩვენ ეტაპობრივად უნდა მივიდეთ თანამედროვე წამყვანი ინდუსტრიული ქვეყნების გამოცდილებამდე, როდესაც სახელმწიფო იღებს სოციალურ პასუხისმგებლობას უმუშევართა დახმარებაზე და, ამავე დროს, მათ გადამზადებაზე. სახელმწიფო უნდა დაეხმაროს ადამიანებს, დაეუფლონ ახალ პროფესიებს, სპეციალობებს და იპოვონ საკუთარი ადგილი შრომის ბაზარზე. ეს პრობლემა ძალიან მნიშვნელოვანია და ჩემი ადმინისტრაციის განსაკუთრებული ყურადღებისა და ზრუნვის საგანი იქნება.

6. ჯანდაცვა: *რა პოლიტიკასა და კონკრეტულ გადაწყვეტილებებს დაუჭერდით მხარს, რათა გაიზარდოს ჯანდაცვის ხელმისაწვდომობა და ამაღლდეს მისი ხარისხი?*

უნდა ჩამოყალიბდეს ისეთი სისტემა, სადაც უმთავრესი იქნება ექიმებისა და პაციენტების ინტერესები. ასეთი სისტემის მშენებლობა უკვე დაწყებულია უნივერსალური ჯანდაცვის სისტემაზე გადასვლით.

ჯანდაცვის პოლიტიკის ამოცანებია, როგორც დაზღვევის სისტემის შემდგომი დახვეწა, ისე, პრევენციული მედიცინის განვითარება. ამ მიზნით, იგეგმება ხელმისაწვდომობის ზრდა ფასებსა და სერვისებზე, აგრეთვე, რაოდენობრივი და ხარისხობრივი გაუმჯობესება: კვალიფიკაციის, ტექნოლოგიების ხარისხის ამაღლება, ახალი ამბულატორიების, საავადმყოფოების აშენება.

7. სოციალური უსაფრთხოება: *რა პოლიტიკას დაუჭერდით მხარს სოციალური უსაფრთხოების გაუმჯობესების მისაღწევად?*

ახალი ეკონომიკური პოლიტიკა მიმართულია შემოსავლების ზრდის შესაძლებლობების გაჩენისკენ. ამასთან, ეკონომიკის გაძლიერებამდე, ხელისუფლება იღებს პასუხისმგებლობას უღარიბესი ადამიანებისთვის მიზნობრივი სოციალური დახმარებების გაწევაზე.

სოციალური დახმარებების მოცულობა კიდევ უფრო გაიზრდება. მალე დასრულდება ახალი მეთოდოლოგიისა და კრიტერიუმების შემუშავება. ახალი სოციალური პოლიტიკა ორიენტირებული იქნება მეტ სოციალურ სამართლიანობაზე - მეტი ყურადღება მიექცევა

მრავალშვილიან ოჯახებს, ავადმყოფებს, პენსიონერებს და შეზღუდული შესაძლებლობების მქონე პირებს.

8. ადგილობრივი თვითმმართველობა: თქვენი აზრით, რა პრინციპით უნდა იყოს ორგანიზებული ადგილობრივი თვითმმართველობა საქართველოში?

ადგილობრივი თვითმმართველობა სახელმწიფო მართვაში მოქალაქეთა თანამონაწილეობის ერთ-ერთი უმთავრესი მექანიზმია.

თვითმმართველობის რეფორმის მიზანია ავტორიტარიზმის პირობებში ჩამოყალიბებული ზეცენტრალიზებული სისტემის დეცენტრალიზაცია, მმართველობის ეფექტიანი სისტემის ჩამოყალიბება. თვითმმართველობა სუბსიდიარობის პრინციპს უნდა დაეფუძნოს. ეს ნიშნავს, რომ გადაწყვეტილებები ადგილებზე უნდა მიიღონ იმათ, ვისაც ყველაზე მეტად ესმის პრობლემატიკა, ყველაზე მეტად შესტკივა გული, ვინც ყველაზე უკეთ იცნობს სიტუაციას. ადგილობრივი თვითმმართველობები ავტონომიური უნდა იყოს ცენტრისგან და პასუხისმგებელი ადგილობრივი მოსახლეობის წინაშე. ასეთი თვითმმართველობები სამოქალაქო მონაწილეობისა და დემოკრატიული ჩართულობის ახალი ტრადიციების დასაწყისად გადაიქცევა.

9. ტერიტორიული მთლიანობის საკითხები: რა კონკრეტულ ნაბიჯებს გადადგამთ ხალხთა შორის ნდობისა და ტერიტორიული მთლიანობის აღსადგენად?

კონფლიქტის არაძალადობრივი გადაწყვეტა ქვეყნის უცვლელი კურსია, რაც ეფუძნება არაღიარების პოლიტიკის გაგრძელებას და ქვეყნის დეოკუპაციის პროცესს.

ჩვენთვის პრიორიტეტულია აფხაზ და ოს მშობთან პირდაპირი ურთიერთობის ხელშეწყობა, საოკუპაციო ხაზებით გაყოფილი მოსახლეობის დაახლოება და მათ შორის ნდობის აღდგენა.

აფხაზეთსა და ცხინვალის რეგიონში მცხოვრებ თანამემამულეებს ვთავაზობთ წარმატებული ქვეყნის ერთად აშენებას, ევროპულ ქვეყანას, ცხოვრებას თავისუფალ, დემოკრატიულ და მშვიდობიან სახელმწიფოში, რომელიც გახდება ნებისმიერი მოქალაქის კეთილდღეობის, ეთნიკური, რელიგიური და კულტურული იდენტურობის შენარჩუნებისა და პოლიტიკური უფლებების ხელშეუხებლობის გარანტი.

საქართველოსთვის განსაკუთრებული მნიშვნელობა აქვს მისი ტერიტორიების, აფხაზეთის და ცხინვალის რეგიონის დეოკუპაციას და ტერიტორიული მთლიანობის აღდგენას. განსაკუთრებული როლი ენიჭება ჟენევის მოლაპარაკებების წარმატებით წარმოებას, ევროკავშირის სადამკვირვებლო მისიისა და საერთაშორისო ორგანიზაციების ჩართულობის ზრდას, ასევე, სტრატეგიულ პარტნიორებთან კოორდინაციის გაძლიერებას.

ამ მხრივ, ყველანი ვაცნობიერებთ რუსეთის როლს. ჩვენ ყველაფერს ვაკეთებთ რუსეთთან ეკონომიკური, სავაჭრო, კულტურული ურთიერთობების აღდგენისა და ნდობის ატმოსფეროს ჩამოსაყალიბებლად. მაგრამ, ამავე დროს, პრინციპულად ვართ - ამ გზაზე არ იქნება არავითარი დათმობა, რაც ჩრდილს მიაყენებს ჩვენს თავისუფლებასა და დამოუკიდებლობას, ჩვენს ღირსებას.

ამ კომპლექსურმა ძალისხმევამ ხელი უნდა შეუწყოს დევნილებისა და ლტოლვილების უპირობო, უსაფრთხო და ღირსეულ დაბრუნებას, გვექონდეს მათი უფლებების დაცვისა და თავისუფლებების განხორციელების მტკიცე გარანტიები.

10. უმცირესობათა უფლებები: *რას ვიქნებით სექსუალურ უმცირესობათა უფლებების დაცვისა და ქვეყნის საზოგადოებრივ-პოლიტიკურ ცხოვრებაში მათი თანასწორუფლებიანობის უზრუნველყოფის საკითხზე?*

დემოკრატიული სახელმწიფოს მიზანია ნებისმიერი ადამიანის უფლების დაცვა. განსაკუთრებით უნდა გაესვას ხაზი უმცირესობათა უფლებებს. თანამედროვე დემოკრატია ნიშნავს უმრავლესობის მმართველობას და, ამავე დროს, უმცირესობის უფლებათა დაცვას. დიდი ყურადღება და ძალისხმევაა საჭირო, რომ უმრავლესობის მიერ მიღებული პოლიტიკური გადაწყვეტილებები არ ზღუდავდეს უმცირესობის უფლებებს.

სახელმწიფომ არ უნდა დაუშვას ამა თუ იმ ნიშნით ადამიანთა დევნა, შვეიწროება და დისკრიმინაცია. ამასთანავე, იგი უნდა ქმნიდეს და იცავდეს ადამიანთა სრულფასოვანი, შემოქმედებითი თვითრეალიზაციის პირობებს.

11. ქალთა მონაწილეობა პოლიტიკაში: *გთხოვთ, აღწეროთ თქვენი ინიციატივები (თუკი ასეთი გაქვთ) და პოზიცია ქალთა პოლიტიკაში თანამონაწილეობის გასაზრდელად საჭირო ღონისძიებების შესახებ.*

საქართველოში ქალთა პოლიტიკაში თანამონაწილეობა მნიშვნელოვნად ჩამორჩება ევროპულ საშუალო მაჩვენებელს. გასულ არჩევნებამდე, ქალთა რაოდენობა პარლამენტში მხოლოდ 6% იყო - ყველაზე დაბალი მაჩვენებელი ეუთოს წევრ სახელმწიფოებს შორის. მდგომარეობა შედარებით გაუმჯობესდა 2012 წლის საპარლამენტო არჩევნებთან ერთად, თუმცა ქალთა წარმომადგენლობა როგორც ეროვნულ საკანონმდებლო ორგანოში, ისე, ადგილობრივი თვითმმართველობის ორგანოებსა და აღმასრულებელ ხელისუფლებაში ნომინალური რჩება.

ქალები მოსახლეობის ნახევარს შეადგენენ, ამიტომ დემოკრატიული სამართლიანობა მოითხოვს, რომ მათი მონაწილეობა გადაწყვეტილების მიღების პროცესებში ადეკვატური იყოს. ნამდვილ დემოკრატიაზე ვერ ვისაუბრებთ, თუ მოსახლეობის ნახევარს პარლამენტში მხოლოდ 6, 10, 15% წარმოადგენს.

საქართველოს ამ მიმართულებით ბევრი რამის სწავლა შეუძლია საერთაშორისო გამოცდილებიდან. უპირველეს ყოვლისა, საჭიროა, მოხდეს ამ საკითხის საზოგადოებრივ და პოლიტიკურ დღის წესრიგში დაყენება. ამისთვის მმართველი გუნდისა და, ზოგადად, პოლიტიკური ელიტის პოლიტიკური ნება უაღრესად მნიშვნელოვანია.

ძალზე მნიშვნელოვანია საზოგადოებასთან მუშაობა. ერთად უნდა დავძლიოთ სტერეოტიპული შეხედულებები ქალის როლის შესახებ და საზოგადოებრივი კონსესუსის საფუძველზე ისეთი საზოგადოება უნდა შევქმნათ, სადაც ყველა ქალს ექნება თვითრეალიზაციის შესაძლებლობა. ქალები ჩაბმული უნდა იყვნენ გადაწყვეტილებების მიღებაში, უნდა იმყოფებოდნენ ძალაუფლების ველში. საქართველოს დემოკრატიულ, ადამიანის უფლებებზე დამყარებულ საზოგადოებად გარდაქმნაში ქალთა როლი ფასდაუდებელია.

12. უმცირესობათა უფლებები: *რა პოლიტიკას გაატარებდით ეთნიკური უმცირესობების უფლებათა დაცვისა და საზოგადოებრივ-პოლიტიკურ ცხოვრებაში მათი მეტი ინტეგრაციისთვის?*

ჩვენი ქვეყნის ეთნიკური, კულტურული, რელიგიური მრავალფეროვნება ჩვენი მთავარი სიმდიდრეა, ნოყიერი ნიადაგია მრავალფეროვანი საზოგადოებრივ-კულტურული სივრცის ფორმირების, ადამიანებს შორის დიალოგისა და ურთიერთგაგებისთვის.

ჩვენ განსაკუთრებით ყურადღებით ვიქნებით, რომ ეთნიკურ უმცირესობათა უფლებები სრულად იქნას დაცული. ამავე დროს, ჩვენ მათ დავიცავთ არა მხოლოდ ნებისმიერი სახის დისკრიმინაციისგან, არამედ შევუქმნით სრულფასოვანი განვითარების პირობებს. განსაკუთრებით მნიშვნელოვანია, რომ მოხდეს მათი სრული ინტეგრაცია სახელმწიფოებრივ-საზოგადოებრივ პროცესებში. ამისთვის ქართული ენის სწავლების ხარისხის ამაღლებას განსაკუთრებულ მნიშვნელობას ვანიჭებთ.

13. გარემოს დაცვა/ეკოლოგია: *გთხოვთ, დაგვისახელოთ თქვენი წინადადებები (თუკი ასეთი გაქვთ), რომლებიც მიმართულია უფრო ჯანსაღი და უსაფრთხო საცხოვრებელი გარემოს შექმნისკენ.*

განვითარების გრძელვადიანი ხედვა უარს ამბობს რესურსებისადმი უტილიტარულ, მყისიერ მოგებაზე ორიენტირებულ დამოკიდებულებაზე. ბუნებისადმი მომხმარებლური მოპყრობა იწვევს ადამიანის საცხოვრებელი გარემოს მოშლას. სწორედ ამის გამოა, რომ დღეს უპრეცედენტო ეკოლოგიური გამოწვევების პირისპირ ვდგავართ. მდგრადი განვითარების სტრატეგია იცავს ეკონომიკურ, სოციალურ და ეკოლოგიურ ბალანსს. ჩვენ ფეხი უნდა ავუწყოთ თანამედროვეობას და უარი ვთქვათ მონორესურსულ პოლიტიკაზე, სადაც ეს შესაძლებელია. უნდა მოვძებნოთ ენერჯის, რესურსების ალტერნატიული წყაროები. ამასთან, მნიშვნელოვანია საზოგადოების

ეკოლოგიური ცნობიერების ამაღლება. პრეზიდენტს ამ პროცესში მნიშვნელოვანი როლის შესრულება შეუძლია.

14. საგარეო პოლიტიკა და სტრატეგიული თანამშრომლობა: *რომელ ქვეყნებთან/ქვეყანათა გაერთიანებებთან/ალიანსებთან იზრუნებთ სტრატეგიული, მათ შორის, სამხედრო-სტრატეგიული პარტნიორობისა და თანამშრომლობის ფორმირებასა ან განმტკიცებაზე? რა ნაბიჯებს გადადგამთ ამ მხრივ? რომელი ქვეყანა/გაერთიანება/ალიანსი წარმოგიდგენიათ საქართველოს მთავარ სტრატეგიულ პარტნიორად?*

ქვეყნის საგარეო პოლიტიკის მთავარი ამოცანა საქართველოს ეროვნული ინტერესების დაცვაა, რაც გულისხმობს საერთაშორისო არენაზე ევროპული, დემოკრატიული და სუვერენული სახელმწიფოს სტატუსის განმტკიცებას. აუცილებელია საგარეო პოლიტიკის გააქტიურება, რათა უზრუნველვყოთ ევროპულ და ევრო-ატლანტიკურ სტრუქტურებში ინტეგრაცია.

საქართველო ევროპის განუყოფელი ნაწილია. ევროპული კულტურა და ღირებულებები ყველაზე ახლოს დგას ქართულ ეროვნულ იდეასა და იდენტობასთან. ჩვენი მიზანია, საქართველო პოლიტიკურადაც გახდეს ევროპის სრულფასოვანი წევრი და საკუთარი წვლილი შეიტანოს საერთო ევროპული სახლის მშენებლობაში.

საქართველოს, ასევე, აქვს ისტორიული მისია, იქცეს ევროპასა და აზიას შორის თანამშრომლობის, დიალოგისა და თანხმობის ადგილად.

15. რეგიონული თანამშრომლობა: *როგორ წარმოგიდგენიათ საქართველოს როლი სამხრეთ კავკასიასა და შავი ზღვის აუზში?*

როგორც შავი ზღვის აუზის ქვეყანა, საქართველო ევროპის გეოგრაფიული, პოლიტიკური, კულტურული, ეკონომიკური, სავაჭრო და უსაფრთხოების სივრცის ნაწილს წარმოადგენს.

შავი ზღვის მეორე ნაპირს ევროკავშირი ესაზღვრება. ჩვენ უნდა დავიწყოთ ხიდის შენება ამ ნაპირისკენ. საქართველომ განსაკუთრებით უნდა გააღრმავოს თანამშრომლობა რეგიონის ქვეყნებთან. შავი ზღვისა და კასპის რეგიონებს შორის პოლიტიკური, ეკონომიკური, სავაჭრო და კულტურული კავშირების განმტკიცებით საქართველომ რეგიონული ლიდერის როლი უნდა მოიპოვოს დემოკრატიული განვითარების თვალსაზრისით.

16. თავდაცვის პოლიტიკა: *როგორ წარმოგიდგენიათ თავდაცვის ორგანიზაცია? სამხედრო სამსახურის როგორ ფორმას უჭერთ მხარს?*

ჩვენმა ხელისუფლებამ უკვე განაცხადა, რომ იგეგმება ეტაპობრივი გადასვლა პროფესიულ სამხედრო სამსახურზე. თავდაცვის სამინისტრო უკვე მუშაობს ამ რეფორმაზე. მე სრულად

ვიზიარებ ქვეყნის თავდაცვის ასეთ ხედვას და მიმაჩნია, რომ ჩვენი ქვეყნისთვის კარგად მომზადებული პროფესიული ჯარი იქნება უსაფრთხოების სანდო გარანტია.

17. უსაფრთხოების პოლიტიკა: როგორ წარმოგიდგენიათ საქართველოს ეროვნული უსაფრთხოების ძირითადი არქიტექტურა/პრინციპები?

საქართველოს დემოკრატიული და მშვიდობიანი განვითარება ჩვენი ქვეყნის ეროვნული უსაფრთხოების ქვაკუთხედაა. იგი ამცირებს საგარეო საფრთხეს, განაპირობებს ქვეყნის სანდო საერთაშორისო პარტნიორად ჩამოყალიბებას.

საქართველოს ეროვნული უსაფრთხოების უზრუნველყოფის გრძელვადიანი გარანტია თავისუფალი სამყაროს სრულფასოვანი წევრობაა, რაც ევროკავშირსა და ნატოში ინტეგრაციით მიიღწევა.

საქართველოს შეიარაღებული ძალები რჩება საქართველოს უსაფრთხოების უმთავრეს გარანტად. აქედან გამომდინარე, ჩვენ უნდა უზრუნველვყოთ საქართველოს შეიარაღებული ძალების პროფესიონალიზმისა და ეფექტიანობის მუდმივი ზრდა.

ამავდროულად, ჩვენ კარგად გვესმის, რომ მშვიდობიანი მსოფლიო ჩვენი ქვეყნის წინსვლისა და ეკონომიკური ზრდის წინაპირობაა. ავღანეთის სამშვიდობო მისიაში მონაწილეობით საქართველოს მნიშვნელოვანი წვლილი შეაქვს საერთაშორისო უსაფრთხოების უზრუნველყოფის საქმეში. ჩვენ გავაგრძელებთ იმ ვალდებულებების შესრულებას, რომელიც ტერორიზმთან და სხვა გლობალურ საფრთხეებთან ბრძოლასა და თანამედროვე გლობალური უსაფრთხოების განმტკიცებას ემსახურება.

ეკონომიკური და ენერგეტიკული უსაფრთხოების უზრუნველყოფის მიზნით, საქართველოში უნდა შეიქმნას ენერგეტიკული უსაფრთხოების მდგრადი სისტემა, რომელიც დაფუძნდება ენერგომომარაგების დივერსიფიკაციაზე, მარაგების შექმნასა და ინფრასტრუქტურის შენარჩუნება-გაუმჯობესებაზე.

ეკონომიკური უსაფრთხოება უნდა უზრუნველვყოთ სტრატეგიული დარგების განვითარებით, ძირითად ინფრასტრუქტურასა და სასიცოცხლო მნიშვნელობის ობიექტებზე სახელმწიფოს პასუხისმგებლობის გაძლიერებით.

თავისუფალი ეკონომიკური გარემოს შექმნა და უცხოური ინვესტიციების გაზრდა-დივერსიფიკაცია ხელს შეუწყობს პარტნიორული ურთიერთობების გაღრმავებას და გაზრდის საქართველოს მშვიდობიანი და უსაფრთხო განვითარებით დაინტერესებულ სახელმწიფოთა რიცხვს.

18. ორსულობის ხელოვნური შეწყვეტა: თქვენი აზრით, უნდა აიკრძალოს თუ არა ორსულობის ხელოვნური შეწყვეტა - აბორტი? რატომ?

ამ ძალზე მგრძობიარე საკითხს განსაკუთრებული სიფრთხილით უნდა მოვეციდეთ. იმ ქვეყნების პრაქტიკა, სადაც აბორტი არალეგალურია, აჩვენებს, რომ აკრძალვა იწვევს არა მათი რიცხვის შემცირებას, არამედ არალეგალური აბორტების ზრდას. ეს კი საფრთხეს უქმნის ქალთა ჯანმრთელობას, ხშირად, სიცოცხლესაც. აბორტის აკრძალვა განსაკუთრებით მძიმე შედეგების მომტანია ღარიბი და სოციალურად დაუცველი ქალებისთვის.

აბორტის წინააღმდეგ ბრძოლის სტრატეგია არის არა აკრძალვა, არამედ რეპროდუქციული ჯანმრთელობისა და უფლებების შესახებ ინფორმირებულობის გაზრდა და ოჯახის დაგეგმვის სერვისებზე ხელმისაწვდომობა. ნებისმიერი სხვა მიდგომა კიდევ უფრო გააუარესებს ქალთა ჯანმრთელობის მდგომარეობას საქართველოში, გაზრდის დედათა სიკვდილიანობას, გააღრმავებს გენდერულ უთანასწორობას და გააასმაგებს ისეთ შემთხვევებს, როდესაც არასასურველი ორსულობის შედეგად გაჩენილ ბავშვებს ნაგვის საყრდელზე ვპოულობთ. ამავე დროს, საკითხის გადაწყვეტა მჭიდრო კავშირშია ქვეყნის ეკონომიკურ განვითარებასთან, სოციალური უსაფრთხოების ზრდასთან, განათლების და სამოქალაქო ცნობიერების ამაღლებასთან.

ჰარმონიული და უფლებებზე ორიენტირებული საზოგადოების ჩამოყალიბებას მხოლოდ მაშინ შევძლებთ, როდესაც ყველა ორსულობა იქნება სასურველი და ყველა ქალის ფუნდამენტური უფლება იქნება დაცული. ამ ვითარების მიღწევა, რა თქმა უნდა, ადვილი ამოცანა არაა. მაგრამ პასუხისმგებლობიანი სახელმწიფოს მიზანი არ შეიძლება სხვანაირი იყოს.

19. გადასახადები და კრედიტი: *უნდა ჰქონდეთ თუ არა კრედიტორებს კრედიტის/გასესხებული თანხის იპოთეკით დატვირთული საცხოვრებელი ფართის ხარჯზე ამოღების უფლება? რატომ?*

როგორც ნებისმიერი ბიზნესი, ბანკებიც თავისუფალი უნდა იყოს, მათ შორის, საკრედიტო პოლიტიკის განსაზღვრისას. თუმცა სახელმწიფო ვერ მოიხსნის მოქალაქეთა წინაშე პასუხისმგებლობას. მან უნდა უზრუნველყოს, რომ წესები იყოს ყველასთვის ნათელი და გასაგები და მოქალაქეები დაცულები იყვნენ.

20. მიწის საკუთრება: *როგორ ფიქრობთ, უნდა შეეძლოს თუ არა უცხო ქვეყნის მოქალაქეებს შეიძინონ სასოფლო-სამეურნეო მიწა საქართველოში?*

ჩვენ დროში მიწა განსაკუთრებული მნიშვნელობის რესურსია. გლობალური გამოწვევები და პლანეტაზე სასოფლო-სამეურნეო სავარგულების ყოველწლიურად შემცირება მიწის რესურსებს კიდევ უფრო ძვირფასსა და მოსაფრთხილებელს ხდის. როდესაც მიწაზე ვსაუბრობთ, მხედველობაში უნდა გვქონდეს არა უბრალოდ რაღაც ფართობის მონაკვეთი, არამედ რესურსი, რომლის ნაყოფიერ ნიადაგად ფორმირებასაც ასწლეულები დასჭირდა. ამიტომ, ერთი მხრივ, მიწა სახელმწიფო მნიშვნელობის საკითხია. მეორე მხრივ კი, მხედველობაში უნდა მივიღოთ

სოფლად მცხოვრები გლეხობის განსაკუთრებული დამოკიდებულება მიწისადმი - მიწა მათთვის უბრალოდ შემოსავლის წყარო არაა. მათი იდენტობა მიწას, წინაპართა ნასახლარს, წარსულს უკავშირდება. ისინი მიწათმოქმედები არიან და საკუთარ თავს მიწასთან მიმართებით აღიქვამენ. სახელმწიფომ ხელი უნდა შეუწყოს ასეთ ხალხს და შესაძლებლობა მისცეს, მართლაც დარჩეს სოფლად, აკეთოს საყვარელი საქმე, მაგრამ, ამავედროულად, გლეხის ცხოვრება უნდა იყოს სრულფასოვანი, საინტერესო და არა დამქანცველი, ამაო შრომა, როდესაც ძლივს მოყვანილ მოსავალსაც ვერ ყიდის. აი, ამის მხარდაჭერა არის სახელმწიფოს პასუხისმგებლობა.

რაც შეეხება უცხოელებზე მიწების გაყიდვას, პრობლემა იმაში კი არაა, თუ რა ეროვნების ადამიანი ყიდულობს მიწას, არამედ იმაში, თუ როგორ უფრო ხილდება ამ სახალხო რესურსს, როგორ იყენებს მას. მოაქვს თუ არა ამას სარგებელი ადგილობრივი მოსახლეობისთვის? თუ ტყის მასივების გაჩეხვასა და მიწის გამოფიტვასთან გვაქვს საქმე, საერთოდ არ აქვს მნიშვნელობა, ეს უცხოელმა ჩაიდინა თუ ქართველმა. წინა ხელისუფლების პოლიტიკამ სოფლად ცხოვრება გლეხებისთვის აუტანელი გახადა და ამიტომ ისინი იძულებული გახდნენ, მიწები, რომლიდანაც თავად მოგებას ვერ ნახულობდნენ, უცხოელებისთვის მიეყიდათ. ჩვენ უცხოელებზე მიწის გასხვისება კი არ უნდა ავკრძალოთ, ალტერნატივა უნდა შევთავაზოთ გლეხებს.